

«Forum per il talian en Svizra»

Porscher il rom d'instrucziun en mintga gimnasi

■ (gsc) Dapi 2012 datti in «Forum per il talian en Svizra», «associazion da var tschinquanta uniuns che s'engaschan per promover e sustegnair lingua e cultura taliana en Svizra» («La Regione Ticino», 25 da schaner 2014, p. 21). I sa tracta d'applitgar l'art. 70.3 da la constituziun federala areguard il talian: «La confederaziun ed ils chantuns promovon la comunicaziun ed il barat tranter las cuminanzas linguisticas.» In tal barat duai pertutgar er il talian. En quest senn ha la Cumissiuon svizra da matura (Csm) interpretà l'art. 9.7 da l'Urden federal da matura (Ufm): «En il rom fundamental 'segund linguatg naziunal' duain ins porscher ina tscherna tranter almain duas linguas.» Questa disposiziun, tenor ina relaziun da la Csm, vegn respectada mo en la mesadad dals gimnasis (v. La Quotidiana dals 12 da november 2013). Ils 25 da schaner 2014, en la sala dal cussegl grond a Cuira, ha l'assemblea dal Forum, presidiada da cuss. naz. Silva Semadeni, vuschà ina moziun che «pretenda ch'il talian vegnia purschì sco rom da matura gimnasiala en mintga gimnasi, e quai sco rom fundamental e/u sco opziun speziala, (...) e

ch'el na vegnia betg lià da cunvegns chantunals u tranter chantuns che limitassan l'offerta da la terza lingua naziunala ad insaquants gimnasis. Nus supplicain la Conferenza svizra da las directuras e dals directurs chantunals da l'educaziun publica d'adattar ad uras l'Ufm areguard la legitimaziun dals attestats gimnasials, per garantir ina dignitad equivalenta a lingua e cultura taliana e meglierar l'offerta gimnasiala; questa, segund il rapport da la Csm, è preschenta mo en la mesadad dals gimnasis.»

Lingua munta cultura

L'approvaziun dal text surmenziunà è stada ina culminaziun da la dieta, en preschientscha dals cuss. gov. Manuele Bertoli (TI) e Martin Jäger (GR), sco era da l'ambassador talian Cosimo Risi e d'in mantun personalitads politicas, mediaticas, culturalas, universitaras e professunalas. In'otra culminaziun è stada la decisiun da l'assemblea, senza cuntravusch, d'organisar il Forum ad in'unioni; sin proposta da Jäger han ins lur elegì unanimamain Bertoli parsura dal Forum, e secretari è vegnì il Puschlavin Giuseppe Falbo, gia secretari da la Pro Grigioni Italiano (Pgi). Ins ha era pudì emprender d'enconuscher Paola Gianoli Tuena (Coppet/VD), parsura nova da la Pgi. La romanista tessinaisa Tatiana Crivelli (Universitad da Turitg) ha declarà a «La Regione Ticino» dals 25 da schaner: «Ins bada l'emprim vair indizi da crisa cur che la plurilinguitad entschaiva, sco ussa, a dar ensemen, (...) cun la sminuziun da las uras d'instrucziun da talian ordaifer il Tes-



La lingua na munta betg mo comunicaziun, mabain ina convivenza da cultura, tradiziuns, modas da viver en in senn pli vast. KEYSTONE

sin ed insaquantas votaziuns cunter las scolas bilinguas en Grischun – ussa vegn in auter referendum. La plurilinguitad s'indeblescha cun l'augment da l'englais (...). Ins dovra l'uscheditg englais dals eroports per communitgar; la lingua na munta però betg mo comunicaziun, mabain ina convivenza da cultura, tradiziuns, modas da viver en in senn pli vast. Emprender la lingua d'in conuman e prubar da la discurren munta prubar da sa metter en sia situaziun.» La «NZZ» dals 25 da schaner è s'infurmada tar Diego Erba, «coordinatur dal Forum, (...) il qual manegia ch'ins duaja promover il talian cunzunt a nord da las Alps (...). En Svizra

viva bunamain la mesadad dals 480 000 umans italo-fons ordaifer la 'Svizzera Italiana', pia gist là nua che la situaziun dal talian saja greva (...). I fa quità che la regenza da l'Argovia vul reducir marcantamain l'offerta da talian en las scolas da district.» I dat avunda da discutir per la proxima dieta dal Forum, ils 9 e 10 da matg a Basilea. Il tema da lezza occurrenza tuna: «Il talian al cunfin». Il grond specialist dals cunfins è l'economist Remigio Ratti (Ligiaun), anteriur cuss. naz. ed instancabel parsura da «Coscienza Svizra» (Blinzuna; segretariato@coscienzavizzera.ch), «gruppo di studio e di informazione per la Svizzera Italiana». Er a Cuira era Ratti

da la partida. Basilea fa endament in illustrer perscrutader svizzer da la cultura taliana: Jacob Burckhardt (1818–1897). Ils 9 da matg, di da l'Europa, fan ins endament la decleraziun da Robert Schuman (1886–1963) l'onn 1950 per «far l'Europa cun realisaziuns concretas che stgaffeschian solidaritads effectivas». I stgaffescha segir ina «solidarità effectiva» sin stgalim europeic d'emprender talian, lingua d'in pajais limitrof cun 60 milliuns olmas, d'in dals principals partenaris commerzials da la Svizra. Tut quai duess inspirar il Forum e sias quatter gruppas da lavur: Il talian en las instituziuns, en l'educaziun, en la cultura, en il mund.